



KEMENTERIAN SUMBER MANUSIA

SIARAN MEDIA

SEMBANG SANTAI TEH TARIK – SUARA AKAR UMBI PEKERJA GIG DIANGKAT DALAM PENGGUBALAN RANG UNDANG-UNDANG PEKERJA GIG 2025

KUALA LUMPUR, 7 Ogos 2025 – Kementerian Sumber Manusia (KESUMA) telah menganjurkan Program Sembang Santai Teh Tarik yang dipengerusikan bersama oleh Timbalan Perdana Menteri, YAB Dato' Seri Dr. Ahmad Zahid Hamidi dan Menteri Sumber Manusia, YB Steven Sim Chee Keong. Program ini menghimpunkan seramai 380 peserta merangkumi penyedia platform, pekerja gig serta wakil kementerian dan agensi berkaitan.

Program ini merupakan kesinambungan kepada sesi meja bulat terdahulu dan bertujuan untuk memberi penjelasan lanjut berkenaan Rang Undang-Undang (RUU) Pekerja Gig 2025 yang bakal dibentangkan di Parlimen tahun ini. Seiring dengan itu, KESUMA telah melaksanakan 36 Sesi Libat Urus (SLU) melibatkan 3,495 peserta dari seluruh Semenanjung, Sabah dan Sarawak. Sebanyak 475 maklum balas bertulis dan lisan telah diterima mencerminkan penglibatan aktif pelbagai pihak berkepentingan.

Pendekatan dialog terbuka yang diadakan ini membolehkan kerajaan mendapatkan pandangan secara langsung daripada pekerja gig dan pemain industri sekaligus memastikan suara akar umbi diangkat dalam proses penggubalan dasar. Ia juga selari dengan komitmen KESUMA untuk memperkukuh landskap ekonomi gig yang lebih adil, inklusif dan mampan.

RUU Pekerja Gig 2025 merupakan satu langkah penting dalam memodenkan sistem perburuhan negara. Buat pertama kali, status dan hak pekerja gig ditakrif secara jelas

dalam kerangka perundangan negara dan memberikan pengiktirafan dan perlindungan undang-undang yang sewajarnya kepada pekerja gig.

RUU ini juga bertujuan melindungi pekerja gig daripada diskriminasi, penyahaktifan tidak adil, serta memastikan akses kepada perlindungan sosial dan penyelesaian pertikaian. Ia mencerminkan usaha berterusan kerajaan ke arah membina sistem pekerjaan yang lebih progresif dan berdaya tahan. RUU ini diharap dapat menjadi pemangkin kepada penyertaan lebih meluas, dan menjadikan perlindungan sosial satu keperluan asas dan bukan lagi pilihan.

RUU ini dijangka dibacakan buat pertama kali di Parlimen pada 14 Ogos 2025 dan dibahaskan pada 26 Ogos 2025, menandakan langkah bersejarah dalam reformasi sistem perlindungan pekerjaan negara. Undang-undang ini bakal memberi manfaat dan perlindungan kepada 1.12 juta pekerja gig di seluruh Malaysia yang selama ini beroperasi tanpa kerangka perlindungan yang jelas.

KEMENTERIAN SUMBER MANUSIA

7 OGOS 2025

LAMPIRAN**LATAR BELAKANG KESUMA**

Kementerian Sumber Manusia atau singkatannya KESUMA adalah kementerian yang bertanggungjawab kepada pembangunan kemahiran, pekerjaan, keselamatan dan kesihatan pekerjaan, kesatuan sekerja, perhubungan perusahaaan, maklumat dan analisis pasaran buruh dan keselamatan sosial.

PERANAN & TANGGUNGJAWAB KESUMA

Membangunkan dan melahirkan modal insan yang kompeten, produktif, responsif dan berdaya tahan dalam pasaran buruh negara ke arah meningkatkan produktiviti negara. Memastikan kelancaran operasi pasaran buruh negara. Meningkatkan kebolehpekerjaan dan penggajian tenaga kerja tempatan bagi memenuhi keperluan pasaran kerja negara. Memastikan perhubungan perusahaan yang harmoni dan kondusif. Mengutamakan aspek keselamatan dan kesihatan pekerjaan. Memastikan jaringan keselamatan sosial yang komprehensif, dinamik dan progresif.

JABATAN DAN AGENSI DI BAWAH KESUMA

JABATAN	AGENSI
Jabatan Tenaga Manusia (JTM)	Pertubuhan Keselamatan Sosial (PERKESO)
Mahkamah Perusahaan Malaysia (MPM)	Institut Keselamatan Dan Kesihatan Pekerjaan Negara (NIOSH)
Jabatan Pembangunan Kemahiran (JPK)	Human Resources Development Corporation (HRDC)
Jabatan Keselamatan dan Kesihatan Pekerjaan (JKKP)	Talent Corporation Malaysia Berhad (TALENTCORP)
Jabatan Tenaga Kerja Semenanjung Malaysia (JTKSM)	Perbadanan Tabung Pembangunan Kemahiran (PTPK)
Jabatan Perhubungan Perusahaan Malaysia (JPPM)	

Jabatan Hal Ehwal Kesatuan Sekerja (JHEKS)
Jabatan Tenaga Kerja Sabah
Jabatan Tenaga Kerja Sarawak